

Darlin Erasmus ta Reina di Dande na Hulanda

Den un Event Plaza na Rijswijk basta bon bishita Darlin Erasmus a keda corona como Reina di Dande na Hulanda. Darlin tambe a bay cu e premio pa e mihor cancion di Pasco. Coordinador di Cultura di Gabinete di Aruba Nuris Dabian hunto cu PR di Gabinete di Aruba Sidney Kock a corona Darlin. Na di dos lugar a keda Jersiray Werleman y tercer premio a bay pa Izellah Ruiz.

Na inicio di e festival Minister Plenipotenciario demisionario mr. Ady Thijsen a tene un discurso unda el a cuminsa na bisa cu e ta hopi contento y satisfecho di ta para na Event Plaza pa e Festival di Dande na Hulanda. ‘Contento pasobra despues di hopi aña e comunidad Arubiano na Hulanda ta haya e oportunidad pa celebra nan dianan di Fiesta cu un di e tradicionnan mas conoci y

respetu na Aruba cu ta e musica di Dande. Un tradicion cu nos como Aruba so tin y p’esey nos mester cultiva e tradicion aki y tesora esaki como algo unico cu ta defini nos como Arubiano,’ asina Sr. Thijsen a bisa.

E mandatario a menciona cu na 2022 Hulanda a cera conoci cu e tradicion aki pa medio di e documentario Dande di Aruba – een bijzondere nieuwjaarstraditie cu a pasa riba prome di Januari 2022 na NPO 2. E documentario di cinematografo Cindy Kerseboom via di combersacionnan cu figuranan importante di Dande na Aruba manera Vicente Ras y Harry Croes dfin a demostra un bunita manera e tradicion di pa pasa cas pa cas pa duna bendicion pa e aña nobo.

Minister Thijsen: ‘Mi satisfaccion ta grandi pa mira cu e aña aki a bin cu iniciativa pa

tene un Festival di Dande na Hulanda. Pa hopi aña Festival di Dande tabata conoci di ta wordo teni na Rotterdam. E organisacion Contacto Arubano Rotterdam (CAR) pa hopi aña a organisa e festival aki. Mi ta kere cu ta na su lugar pa na e momento aki rindi homenahe na tur esnan cu pa añanan a dedica nan tempo y energia pa conserva e tradicion aki na Hulanda. E evento na Hulanda tabata special pa esnan cu pa algun motibo no por ta na Aruba den e dianan di Fiesta y toch por sinti e calor di Pasco y Aña Nobo,’ segun e mandatario.

Minister Thijsen a gradici tur esnan cu a traha duro y incansabel pa e festival por a tuma lugar y a desea tur e participantenan hopi exito. El a termina su discurso cu entrega di un plakkaat di reconocimiento di parti di Gabinete



di Aruba y Gobierno di Aruba na Marcelino Rodriguez pa su aporte grandi pa añanan na Festival di Dande na Hulanda.

E programa a sigui cu e festival mes cu banda di e Dande e participantenan a canta un cantica di Pasco. E conocido cantante Arubiano Lidwina Booi a trece e ambiente di Pasco entre otro cu su can-

tica clasico ‘Nochi di Pasco’. Despues e publico a keda deleita cu un presentacion di Grupo di Betico.

Sigur e Festival di Dande e brinda hopi Arubiano na Hulanda e atmosfera di Pasco Arubiano, leu for di cas.

E potretnan ta cortesia di Arubahuis.

